



Aslak W. Jensen, Siumut
Inatsisartunut ilaasortaq
inatsisartut@ina.alla.gl

Sikuki pillugu § 37 naapertorlugu apeqquteqaammut 2022-084-imut akissut

Asasara Aslak W. Jensen

27-05-2022
Suliaq nr.: 2022 - 9708
ID. nr. 76543798

Inatsisartut suleriaasianni § 37 naapertorlugu Sikuki pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Nuummi aalisariutaatillit Sikukip umiarsualiviani akiliuteqartinneqartarput. Akiliuteqartitsinermi angallatip angissusaa usitussusaaluunniit aallaavigineqartarpa?

Akissut: Umiarsuit 70 BT (bruttotons) tikillugu usisinnaasut Aalisartut Talittarfiani, Fabrikkip Talittarfiani, Amutsiviup Talittarfiini, Innannguup Talittarfianilu talinnganerinut aalajangersimasumik akigititaqartoq, umiarsuarnullu 70 BT-it sinnerlugit usisinnaasunut BT naapertorlugu naatsorsuisoqartartoq Sikukip akigititaani allassimavoq. Umiarsuup usisinnaassusaa malillugu BT naatsorsorneqartarpoq.

Apeqqut 2: Sikukimut talinngasarnermut akiliutit qanoq ukunani amerlatigippat?

a. Umiatsiaararsortunut tunisinermi tonsimut akiliuteqartarnermi?

Akissut: Umiarsualivimmiinnermut akileraarutit pillugit Inatsisartut inatsisaat nr. 20, 30. oktober 1992-imeersoq naapertorlugu umiarsualivimmiinnermut akileraarusiisoqartarmat, umiarsualivimmiinnermut akileraarut pineqangitsoq ilimagineqarpoq. Sikukip atuisunut akiliuteqartitsisarnera pineqarsimassasoq ilimagineqarpoq. Sikukip akigititai naapertorlugit aalisakkanut qalerualinnullu akigititat tonsimut naatsorsorneqartarput. Massakkut tonsimut akigititaaq 38,64 koruuniuvoq, akigititarlu taanna 1. juuli 2022-miit peerneqassaaq.

i. Umiatsiaaqqat qanoq amerlatigisut pineqarpat?

Akissut: Tunisinerit eqqaassanngikkaanni, umiatsiaararsortut Sikuki atorneq ajorpaat. Umiatsiaaqqat amerlanersaat Kangerlukasik Avannarlermi Sarfaannguanilu kommunip puttasuini pitunneqartarput. Tamanna tunuliaqutaralugu umiatsiaaqqat amerlassusaaq Sikukimit nalunaarsorneqanngillat, Sikukilli missiliorpaa umiatsiaaqqat 100-150-iusut.

b. Angallataatillit taleqqanerannut?

Akissut: BT-imut naatsorsorlugu umiarsuit usisinnaassusaat naapertorlugu akigitat nikerartut Sikukip akigititaani allassimavoq. Aalisartut Talittarfianni, Fabrikkip Talittarfianni, Amutsiviup Talittarfiini kiisalu Innannguup Talittarfianni umiarsuarnut akigititaq aalajangersimalluni, 70 BT tikillugu usisinnaasunut ukiup affaanut akigititaq 9937 koruuniuvoq. Angallatinut 70 BT sinnerlugu usisinnaasunut akigititaq BT naapertorlugu naatsorsorneqartarpoq. Kisiannili Naalakkersuisuniit ilisimatitsissutigineqarsinnaavoq, akigititaq taanna 1.7.2022-miit ukiup affaanut 5.000 koruuninut allanngortinneqartussaammat.

i. Angallatit qanoq amerlatigisut pineqarpat?

Akissut: Angallatit katillugit 50-it Sikukimi talinngasartutut allassimasuutigineqarput. Taakkunannga sinerissami aalisariutit 21-t, angallatillu 29-t.

c. Containerinik inissiinermit? (Nunaminertamik attartornermi)

Akissut: Nunaminertamik attartorneq Sikukip akigititaani allassimavoq, atuisullu ataasiakkaat kvadratmeterit attartugaat malillugit attartornermi akigititaq naatsorsorneqartarluni.

i. Inissinneqartut qanoq pineqartarpat?

Akissut: Apeqquut paasinngilara.

Apeqquut 3: Arctic Kommandop umiarsuai ullorpassuit Sikukip umiarsualiviani taleqqasartut Nuummi angallataatillit talinngasarnerat assigalugu akiliuteqartinneqartarpat?

Akissut: Issittumi Sakkutooqarfik umiarsualivimmiinnermut akileraarutininik akiliineq ajorpoq, tak. umiarsualivimmiinnermut akileraarutit pillugit Inatsisartut inatsisaanni nr. 20-mi, 30. oktober 1992-imeersumi § 2, imm. 4.

Issittumi sakkutooqarfik umiarsualivimmiinnerminut akiliineq ajorpoq, aammalu inigisaq allanit atorneqartussanngortillugu nuuttarluni. Kisianni eqqaavinnik avatangiisinullu mianerinninnissamut tunngatillugu atugassarititaasunik atuinermut akiliisarpoq, taamatullu innaallagissamut, imermut allatigullu sullinneqarnermut atukkaminut akiliisararluni.

a. Akiliisinneqartarsimappata akiliisitseriaaseq qanoq ittoq atorneqarpa?

Akissut: Suliffeqarfiit Namminersorlutik Oqartussanit pigineqartut akiigassaliornermik isumagisaqarpiarnersut Naalakkersuisunit ilisimaneqanngilaq, tamanna suliffeqarfiit namminneerlutik susassaqarfiattut isigineqartariaqarmat.

b. Akiliisinneqartarsimangippata sumik peqquteqarpa?

Akissut: Umiarsualivimmiinnermut akileraarutit pillugit Inatsisartut inatsisaanni nr. 20, 30. oktober 1992-imeersumi § 2-mi imm. 4 naapertorlugu sorsuutit danskinit nunanillu allanit pigineqartut kiisalu danskit nunallu allat naalagaaffiisa umiarsuaataat akileraarummik akiliineq ajorput.

Ilassutitut paasissutissiissutigineqarsinnaavoq, naalagaaffiit avataaneersut umiarsuaat il.il. pillugit inatsimmi nr. 198-imi, 16. maj 1950-imeersumit aalajangerneqartutut nunat assigiinngitsut akornanni isumaqatigiissutit naapertorlugit akiliussinissamut, qularnaveeqqusiusaqaarluni akiliisitsiniartarnermut, arsaarinnissuteqarnissamut, inatsisilluunniit naapertorlugit allatigut uninngatitsinissamut inatsisit Naalagaaffiit umiarsuaataannut atuutsinneqanngimmata. Taamaattorli eqqaavinnik avatangiisinullu mianerinninnissamut tunngatillugu atugassarititaasunik atuinnermut akiliisoqartarpoq, soorluttaaq innaallagissamut, imermut allatigullu sullinneqarnermut akiliisoqartarpoq. Naalagaaffiit umiarsuaataat talittarfinni aalajangersimasumik aamma talinngasinnaanngillat, umiarsuillu allat talissappata illikartussaallutik.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Erik Jensen